

修訂日期: 2004/12/15 發行日期: 2006/2/15

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 20, No. 1179

原始資料: 蕭鎮國大德提供, 北美某大德提供

No. 1179

文殊師利菩薩六字呪功能法經

南無一切利益尊者文殊師利童子菩薩摩訶薩呪曰。

闍婆計陀那(上)摩

於此文殊師利菩薩六字呪功能法。我今說。若有人每日誦此呪七遍。決定罪業得除滅。若有人能每日誦此呪一百八遍。其人臨命終時。現前見文殊師利菩薩。若有人受持此呪得成法者。先食菜或食乳糜。或食大麥子粥。或食大麥麩或乞食。每日平旦日午日沒三時洗浴。別著一具淨衣。即誦此呪六十萬遍法即成就。於後不割斷漚楨上。其畫匠人受八戒。不用膠畫文殊師利菩薩。於蓮華上座說法之像。一切莊嚴具足。作童子形天衣褙左肩。於右應畫作聖觀自在菩薩。坐蓮華座手執拂。左邊應畫聖普賢菩薩。像上兩邊虛空。於雲中出呪仙手執花鬘作。畫像下應畫持呪人手執香爐。瞻仰文殊師利菩薩。其像四邊皆應作山峯。於菩薩座下。應作花池充滿蓮華。已後於舍利塔前面向西。安楨廣大供養已。用蘇燃燈。取闍提花一千八枚。取一一花各呪一遍於像面散。即有聲出聞微妙聲或楨動。若聞妙聲時得稱心。若楨動時一切諍論中得勝。一切世間言教皆通達。一切眾生皆愛樂。若不成此法。餘一切事業皆不得成就。

又法沈香長八指任麤細。於蘇合香油塗。於以却陀羅木炭無烟火中各呪一遍。從初夜至明相出時燒。即見文殊師利菩薩親自來。於呪師前隨所求皆與滿足。唯除淫欲。

又法於楨前以檀香晝夜燒不斷。誦此呪。文殊師利菩薩親來。為說甚深法皆得勝解。永離一切病得自在。得入菩薩地。

又法以紫檀長六指剋作蓮華。更研紫檀末和水。塗之誦百千遍。至十五日夜滿月時。於楨前取花葉兩手葉花誦呪。至於頂上光出即取其花。令彼人成如二八十六歲人身相端嚴。金色光明過於千日。威光如天童子一切成就。呪仙皆恭敬壽命一劫。劫盡已後往生極樂世界。

又法於月蝕時。取白昌蒲根。以瞿妹耶糞乳酪蘇。比五和洗昌蒲根。洗已。寶鉢羅樹葉果禮(下安四葉上著三葉)呪至或烟出或煖火焰出。若煖氣時。得眾生歡喜及一切論難皆勝。若烟出時。得安達底壽一萬年。若火焰出得昇阿迦舍。壽一大劫。

又法取黃牛有犢子者。攪乳酪取蘇置熟銅器中。以寶鉢羅七葉覆之呪之。如上烟等三事成就。即服此蘇。或多聞或安達羅。或昇阿迦舍。

又法取布央迦羅子於月蝕。置日中含誦此呪。至子動時。取三種銅作珠作孔。內子於珠孔中含住。即安陀利出口。即見之。

又法取釘香口含。誦此呪六十萬遍已。隨共人語所求皆得。

又法食乳大麥子或麩。誦呪一百二十萬遍。得成呪仙。

又法乞食不得語。滿十萬遍得安達地多。若誦呪滿一俱胝。即見聖者文殊師利菩薩如是說法。決定令得入一生補處大菩薩眾。若每常誦此呪。一切蒙利皆得成就。

又法取安悉香擣末。以蘇和為丸。如小棗作十萬丸。一一皆呪一遍。火中燒之至盡。即金錢十萬枚。

又法於流入海大河中。以一萬蓮華各呪一遍。擲置河中至盡。如彼蓮華數量寶伏藏見。得其藏受用無盡。

又法油麻以酪蘇和。一撮各各呪一遍。置火中至十萬遍。其人得財富。能施與一切物。

又法取未墮地瞿妹耶泥地作壇。以種種花散其上坐。每日誦呪一千八遍。即讀大乘經。至滿一月即得聰慧。

又法取牛黃呪一千八遍塗額上。一切眾生見者皆歡喜。於頂上髮呪七遍結之。一切惡人不能損害。

又法取鷄知摩羅果一萬顆。一一呪一遍。置火中燒至盡。一切諸病皆得除愈。

文殊師利菩薩六字呪法一卷

以耨尾山高山寺之本。於洛北大報恩寺遺教會之砌寫之。八家錄云。六字神呪經一卷。註云或云六字呪經。貞元。梵釋欠。註亦云六字呪法。題云文殊師利菩薩六字功能法。薄草子二。引用此經。

時天明五乙巳年二月八日 智積輪下東武慈忍識 享和改元仲秋八月。請求慈忍師之本令寫之 當山慈心院傳燈等校驗加。訓予更再訂授於工公于天下。

豐山長谷總持蘭若沙門快道誌

享和三年癸亥四月朔日一校加筆畢慈順